



政台典訓初集

卷六十七
崇儒



政治典訓初集卷第六十七

崇儒

○康熙九年五月壬午

上允御史傅世舟言以宗儒程顥程頤後裔自

明末遭寇亂流亡○蔭襲久絕○

命禮部議以程顥裔孫宗昌程頤裔孫延杞為

五經博士世襲

○康熙二十一年二月戊戌奉大學士臣

上遣領侍衛內大臣國舅佟國維大學士明珠
往伯夷叔齊廟行禮。瀕行

諭曰。伯夷叔齊。古之聖人。清風可仰。爾等前往。
可焚香展敬。又

賜守廟人白金十兩。

○康熙二十三年十一月己卯

上南巡過曲阜將詣闕里先

命國子監祭酒阿禮瑚致祭於啓聖公祠。黎明。

上御輦設鹵簿進曲阜南門詣

聖廟。至奎文閣前下輦。由甬道行。至大成殿。

行三跪九叩首禮。四配十哲兩廡從官分

獻樂舞間作禮畢。

上幸詩禮堂。行聖公孔毓圻等行禮畢。監生孔

尚任進講大學聖經首節。舉人孔尚鉉進

講易經繫辭首節。講畢。

上命大學士王熙

諭衍聖公孔毓圻等曰至聖之道與日月並行與
天地同運萬世帝王咸所師法下逮公卿士
庶罔不率由爾等遠承聖澤世守家傳務期
型仁講義履中蹈和存忠恕以立心敦孝弟
以修行斯須勿去以奉先訓以稱朕懷其祇
遵毋替毓圻等跪聽畢

上步至大成殿瞻仰

聖像歷覽

聖蹟及歷代碑記復至大成殿前

命大學士明珠王熙等宣

諭曰至聖之德與天地日月同其高明廣大無
可指稱朕向來研求經義體思至道欲加贊
頌莫能名言特書萬世師表四字懸額殿中
非云闡揚聖教亦以垂示將來衍聖公孔毓
圻等跪受

御書謝

恩畢

上又命明珠等宣

諭曰歷代帝王致祀闕里或留金銀器四朕今親詣行禮務極尊崇至聖異於前代所有曲柄黃蓋留之廟中以示朕尊聖之意毓圻等

跪受謝

恩畢

上復幸詩禮堂

賜毓圻

御製過闕里詩一首詩曰鑿輅來東魯先登夫子堂兩楹陳俎豆數仞見宮墻道統唐虞接儒宗洙泗長入門撫松柏瞻拜肅冠裳毓圻等跪接捧誦謝

恩奏曰前代幸闕里詩唯唐明皇一首今仰誦聖製意義正大聲調肅皇寶遠過之至於御筆精妙超越千古臣得永為傳家世寶不勝

感激之至又

頒賜衍聖公五經博士及曲阜知縣

日講四書易經書經解義人各一部又

賜衍聖公狐腋蟒服一。黑貂裘一。表裏各五疋。

又

賜五經博士曲阜知縣及四氏子孫在仕籍者

蟒服各一襲又

賜孔氏子孫進士舉人貢生袍服有差監生生

員白金各五兩曲阜縣康熙二十四年地

丁銀盡行蠲免

上詣孔林於洙水橋下馬步行至墓前北面跪

大學士明珠捧金椀酒

上三酌畢行三叩首禮仍步至前殿孔毓圻等

頓首謝大學士明珠王熙等奏曰先師孔

子道大德隆為萬世師為百王法猶有其

德而無其位我

皇上德位兼隆。心契

聖學躬脩。至道作君作師。以立人極。是以尊師
重道。典禮隆脩。度越前王。歷觀帝王。幸闕
里者。儀文之盛。未有如我

皇上者也。臣等適逢

聖明。脩員扈從。不勝忻忻之至。是日

上駐蹕兗州府西關。又

諭大學士明珠曰。周公古大聖人。制禮作樂。垂

示萬世。今廟在曲阜。應行致祭。此係大典。爾

衙門會同禮部翰林院詳議以聞。諸臣奏言

道統之傳。上自堯舜。逮於周孔。我

皇上脩堯舜之德。明周孔之道。

躬祀闕里。復

命致祭周公廟。廷禮儀隆盛。洵為萬世章程。應

令該衙門即撰祭文。遣官致祭。

上曰。致祭周公。禮宜隆重。其遣恭親王長寧及

禮部尚書介山偕往。以見朕尊崇先聖之意。

○康熙二十四年正月乙酉初

上幸闕里。行聖公孔毓圻請增擴孔林。歷朝賜地。

詔特許之。至是復

允部議。

勅山東巡撫隱度孔林四面各宜增擴幾丈。內有民地若干一併確議以聞。

○二月庚子初周公後裔東野沛然乞

賜襲封。部議不准。

上曰。周公承接道統。繼往開來。功德昭著。其子孫應給與職銜。令九卿詹事科道確議具奏。於是九卿等遵

旨奏覆。

上遂授東野沛然為五經博士。給田修廟。使世世奉祀焉。

○三月壬戌禮部議覆御史任珣題請
御製闕里碑記一疏

上曰孔子聖集大成道隆德備參兩天地卓冠
古今歷代帝王咸所師法朕研精經籍志切
欽崇其勒碑於廟朕親撰文書寫以昭尊奉
至意

御製至聖先師孔子廟碑曰朕惟道原於天弘之
者聖自庖羲氏觀圖畫象闡乾坤之秘堯舜

理析危微厥中允執禹親受其傳湯與文武
周公通承其統靡不奉若天道建極綏猷夏
乎尚矣孔子生周之季韋布以老非若伏羲
堯舜之聖焉而帝禹湯文武之聖焉而王周
公之聖焉而相也巋然以師道作則與及門
賢哲紹明絕業教思所及陶成萬世是伏羲
堯舜禹湯文武周公之統唯孔子紹述而先
大之矣問嘗誦習詩書之所刪述大易之所

演繫春秋之所筆削。禮樂之所修明。本末一貫。根柢萬有。殆與覆載合其德。日月並其明。四時寒暑協其序焉。故曰仲尼之道。一天道也。朕敬法至聖。景仰宮牆。嚮往之誠。弗釋寤寐。歲甲子十有一月。時邁東魯。躬詣曲阜。展修祀事。復謁聖墓。循撫松栢。儀型在望。俊乎至德之親人也。朕忝作君。啟牖下民。深惟夫子師道所建。百王治理備焉。舍是而圖郅隆。

曷所依據哉。因勒文於石。彰朕尊崇聖教。以承天治民之意。系以辭曰。遊哉三五。維辟之式。於皇尼山。師道允植。天畀木鐸。覺彼羣生。百行以正。六籍以明。賢邁唐虞。聖則河洛。綏來動和。文博禮約。鳳衰雖嘆。麟德感祥。學昌洙泗。統歸素玉。炎漢崇儒。少牢用饗。厥後賢君。高山是仰。予懷至聖。蒞彼東方。音徽云渺。道德彌光。鬱鬱瑩林。峩峩祠殿。企慕安窮。羨

牆如見。秦岱匪高。東海匪深。敬揚懿範。終古式欽。

○四月癸巳先是甲子冬

上幸闕里閱孔子植檜因

製檜樹賦一篇至是孔毓圻言

皇上聖學淵宏龍章浩瀚自秦漢以來未有表

揚如此盡善者乞勒碑樹間以壯觀瞻以

垂永久

上從之

○六月庚戌

詔山東撫臣修孟子廟

上既命修先師孔子廟又修周公廟皆

賜御書匾額碑記撫臣因言孟子廟亦傾圮請

加修葺以光盛典仍

賜御書匾額碑記如例

上皆允之并

命江西撫臣修葺白鹿洞書院。崇祀宋儒朱熹。
亦

賜御書匾額焉。

八月

詔增廣孔林地一十一頃有奇。免其稅糧。

○十月己丑。國子監祭酒阿禮瑚疏請

御書萬世師表四字。一如闕里文廟例。懸額勒
石太學。以垂永遠。

上曰。太學乃萬方瞻仰之地。宜如所請。以昭尊
師重道之意。其令禮部知之。

康熙二十五年三月丁卯。禮部議准布政
使張仲舉題請。宗儒程顥程頤張載印雍
朱熹各有專祠。祈

賜御書匾額。

上曰。前哲有功聖學。允宜表勅。其依議行。

○七月丙戌

御製至聖先師孔子贊曰。蓋自三才建而天地不
居其功。一中傳而聖人代宣其蘊。有行道之聖。得
位以綏猷。有明道之聖。立言以垂憲。此正學所以常
明。人心所以不泯也。粵稽往緒。仰溯前徽。堯舜禹湯
文武。達而在上。兼君師之寄。行道之聖人也。孔子
不得位窮而在下。秉剛述之權。明道之聖人也。行
道者勲業炳于一朝。明道者教思周於百世。堯舜
文武之後。不有孔子。則學術絲棼。仁義湮塞。斯道

之失傳也久矣。後之人而欲探二帝三王之
心法。以為治國平天下之準。其奚所取衷焉。
然則孔子之為萬古一人也。審矣。朕巡省東
國。謁祀闕里。景企滋深。敬摘筆而為之贊曰。
清濁有氣。剛柔有質。聖人參之。人極以立。行
著習察。舍道莫由。維皇建極。維后綏猷。作君
作師。垂統萬古。曰惟堯舜。禹湯文武。五百餘
歲。至聖挺生。聲金振玉。集厥大成。序書刪詩。

定禮正樂。既窮象繫。亦嚴筆削。上紹往緒。下
示來型。道不終晦。秩然大經。百家紛紜。殊途
異趣。日月無踰。羨墻可晤。孔子之道。惟中與
庸。此心此理。千聖所同。孔子之德。仁義中正。
秉彛之好。根本天性。庶幾夙夜。勗哉令圖。溯
源洙泗。景躅唐虞。載歷庭除。式觀禮器。摘毫
仰贊。心為遐企。百世而上。以聖為歸。百世而
下。以聖為師。非師夫子。惟師於道。統天御世。

惟道為寶。泰山巖巖。東海泱泱。墻高萬仞。夫
子之堂。孰窺其藩。孰窺其徑。道不遠人。克念
作聖。

○ 唐成先是九卿會議江南督學李振裕御
史許三禮條奏先賢先儒增祀位次一議
當以周敦頤程顥程頤邵雍張載朱熹在
先儒之上左丘明之下一議應照世代序
次從違不一至是

上問大學士決所從。明珠對曰：滿大臣之意，以師弟相次為不然。

上曰：定先賢先儒之位次，應視其道德為先後，不可援師弟為定例。即如明末從師生同年起見，恩怨報復，互相標榜，全無公爾忘私之意。雖寬抑非禮之事，瞻徇情面，每多掣肘。未有特立獨行，直心行事者。是以明之季年，諸事廢弛，不可振起。今亦不得謂之絕無也。越

上從之。八月戊寅，九卿再議，請照現行例行。

○十二月辛亥朔，先是

上東巡幸孔廟

特命致祭周公，並錄其子孫世襲五經博士。又命巡撫張鵬並修周孟二廟。至是鵬奏二廟工竣，請

御製碑文匾額，以垂萬古。疏下禮部，部議應如

所請

上報可

御製周公廟碑曰世運代嬗隔越千載則必有
神哲挺生其間以承大統以作名世惟公體
上聖之質紹祖考之德孝友篤仁左右寧王
厥勲爛矣及乎負扆能以勤勞寅恭惇大忠
信之道翼贊其君太和洽而頌聲作焉夫功
莫大於致治綏邦業莫隆于制禮作樂公身

兼數器開物成務其龐鴻炳燦之烈既已載
于詩書志諸史冊至于繫文辭定官禮撰爾
雅出言為經又何博奧難窮也昔孟子論列
古帝王至於公曰兼三王施四事而韓愈亦
歷數堯舜禹湯文武以至公蓋道統之傳如
此豈僅以治理之彰彰者與遙想風徽官公
遺嗣俾昭世澤於無窮既命有司新公廟貌
希慕之餘勒石頌德而繫之以詩詩曰遠古

民和混混茫茫。列聖經綸。肇軒迄商。叙厥倫
紀。賁以采章。公監二代。揆時立制。有因有除。
禮明樂備。體國經野。成理萬彙。集武之勳。紹
文以孝。代成誠民。並孔立教。為子為臣。是則
是做。宗邦綿歷。忠厚所貽。貞珉載鐫。作頌致
思。鳧嶧同時。億禩為期。

御製孟子廟碑曰。自王迹熄于春秋。聖人之道
或幾於泯滅。卒之晦而復明。歷千百世而不

蔽者。恃有孔子也。孔子沒百有餘年。浸假及
於戰國。楊墨塞路。禍尤烈于曩時。子輿氏起
而闢之。於是天下之人。始知誦法孔子。率由
仁義。斯道之有傳。至于今。賴之。是以後世學
者。如韓愈。蘇軾之徒。咸推其功。以配大禹。而
閔洛之儒。咸尊為正學之宗。傳焉。虜盛已。夫
洪水之禍。止於人身。已滿。楊墨之禍。隱然直中
於人心。不有孟子。使楊墨濫觴于前。釋老推

波于後。後之人。雖欲從千載之下。探尼山之遺緒。其孰從而求之。因推述厥義。刻文于石。俾揭于鄒之廟。其文曰。尼聖既往。夏矣音微。後百餘歲。聖緒寢微。尚異實繁。揚墨競煽。陷溺之禍。酷于昏墊。惟子與氏。距跛放淫。以承先聖。以正人心。述舜稱堯。私淑孔子。正學修明。百世以俟。不有是者。斯道孰傳。宇宙晦霧。萬物狂僨。我讀其書。曰仁曰義。遺澤未涇。聞

風可企。嶽嶽亞聖。巖巖泰山。功邁禹稷。德參孔顏。刻石茲文。於祠之下。誦烈揚休。用告來者。

。乙卯

上親書學達性天四字匾額

賜白鹿洞書院。嶽麓書院。周敦頤等六子專祠。遣官前往懸掛。其白鹿洞嶽麓二書院應

命頒經史

命國子監印刷一同齎送

。康熙二十七年九月己卯

詔以張載嫡裔張守先世襲五經博士先是禮

部以張載十七代孫張夢熊請授世襲

上曰張載乃前代名儒其子孫既與官職必真

係嫡派方無負崇儒重道之意令巡撫再行

詳察務得實據到日定議至是陝西巡撫布

雅努移准直撫于成龍取張載宗譜併世

系類考題請部議以宗譜內開張載祠墓

雖在郿縣迨五世孫張晉食邑於灤十四

世孫張文運歸郿奉祀明天啟二年周程

張朱例授五經博士按世系類考張文運

之長子承嗣承嗣之長子元福開載甚明

今元福長子夢熊既故應令其子張守先

世襲

上從之

○康熙二十八年正月辛巳
上駐蹕山東德州先是

御撰孔子孟子及周公廟碑文各一篇手書勒
石衍聖公孔毓圻等奏請

御書墨本以為世寶因

命裝潢成冊是日

分賜衍聖公孔毓圻博士孟貞仁東野沛然
等

○閏三月癸丑

御製顏子贊曰聖道早聞天資獨粹約禮博文
不遷不貳一善服膺萬德來萃能化而齊其
樂一致禮樂四代治法兼脩用行舍藏王佐
之器

御製曾子贊曰洙泗之傳魯以得之一貫曰唯
聖學在茲明德新民止善為期格致誠正均
平以推至德要道百行所基纂承統緒修明

訓辭

御製子思子贊曰於穆天命道之大原。靜養動
察。庸德庸言。以育萬物。以贊乾坤。九經三重。
大法是存。篤恭慎獨。成德之門。卷之藏密。擴
之無垠。

御製孟子贊曰哲人既萎。楊墨昌熾。子輿闢之。
曰仁曰義。性善獨闡。知言養氣。道稱堯舜。學
屏功利。煌煌七篇。並垂六藝。孔學攸傳。禹功

作配

○康熙二十九年九月辛亥

上允原京口將軍張思恭所請

詔諭官兵人民經過文廟俱令下馬并禁學宮
放馬污踐

○康熙三十二年九月己巳禮部題闕里

孔廟工成遣官致祭

上曰闕里孔廟修建鼎新此祭關係大典朕遣

皇子前往告祭着再議具奏。

御製重修闕里孔子廟碑曰。朕惟大道昭垂堯舜啟中天之聖。禹湯文武。紹微危精一之傳。治功以成。道法斯著。至孔子雖不得位。而贊修刪定。闡精義於六經。祖述憲章。會衆理于一貫。為往聖繼絕學。為萬世正人心。使堯舜禹湯文武之道。燦然丕著于宇宙。與天地無終極焉。誠哉先賢所稱自生民以來。未有盛

於孔子者也。往歲甲子。朕巡省東方。躬詣闕里。登聖人之堂。祇將祀事。觀其車服禮器。金石絃歌。蓋徘徊久之。不能去焉。願聖廟多歷年所。丹雘改色。榱桷漸圯。用是愜然于心。特發內帑。專官往董其役。鳩工庀材。重加葺治。經始於辛未之夏。事竣於壬申之秋。廟貌一新。觀瞻以肅。蓋深惟孔子之道。垂範今古。朕願學之志。時切于懷。每攷天人性道之原。修

齊治平之要。思以遠紹前緒。牖迪生民。凡所
以尊崇褒顯者。靡不隆禮竭誠。以將景行。仰
止至意。而况廟廷之地。尤為聖人神明所憑
依者哉。今者登堂而陳俎豆。入室而習禮儀。
營構既堅。采章彌煥。庶幾於朕心。深有慰焉。
用是特遣皇子胤祉。敬展禋祀。以告落成。凡
我臣民。瞻仰宮牆。倍增嚴翼。尚益思敦崇德
義。砥礪倫常。以不負朕尊師重道之意。豈不

休與。因勒貞石。系以辭曰。麟書啟瑞。素王挺
生。上律下襲。玉振金聲。範圍百代。陶甄萬類。
道脩中和。德參天地。立型垂訓。師道昭宣。象
懸七曜。海納百川。曩巡東魯。臨河登岱。峩峩
尼山。羨墻斯在。虔恭展謁。至德是欽。宗風溥
博。教澤宏深。洙泗之陽。殿寢翼翼。上棟下宇。
神靈安宅。冬官特飭。締造維新。宏規大啓。肅
奉明禋。聖人之居。永以觀德。千載傳心。四方

式則

○康熙四十一年正月壬寅

詔修文廟及國子監公廡以和碩裕親王董其事

○五月丁亥禮部以五經博士程衍祀請給

程子祭田議不許

上曰程子宋之大儒。祀典不可有缺。但給與祭田。或為其子孫之不肖者變鬻。則祀典仍缺。

其令州撫藩司善為酌處。務令程氏子孫世

世奉祀。永遠無缺。祭田可勿給。

○康熙四十二年五月壬戌禮部覆順天府

府丞程文彛題請修理府學之尊經閣等

處議不准行

上碩大學士等曰伊等官俸無多。國子監文廟

現交廣善庫官員修理。順天府學尊經閣等處亦交廣善庫修理。

○六月甲午

上御書闡道醇儒四大字匾額

命景州知州周越懸於董仲舒廟

○十二月庚辰

上駐蹕磁州屬杜村鋪南

賜子貢裔博士端木謙

御書賢哲遺休四大字匾額

命懸子貢之墓

○康熙四十四年三月壬戌大學士張玉書

陳廷敬捧出

御書孔宅匾額聖蹟遺徽四大字對一聯付督

學張廷樞傳

諭曰朕比臨幸松江道經青浦據貢監生員孫
鏗等奏青浦之北地名孔宅自漢時至聖苗
裔避地至此奉至聖衣冠環壁葬焉懇請頒
賜匾額對聯朕念孔子乃萬世之師既有遺

蹟急宜表彰。因於萬幾之暇。親書匾額對聯。以示尊崇先聖之意。但此匾額對聯。若發與孫鏗等。恐摹刻未能如式。爾選良工摹刻。頒發。

○四月戊寅

御書至德無名四大字匾額

命宋駿業懸吳泰伯廟

○己卯

上駐蹕蘓州府

御書范仲淹祠堂濟時良相四大字。吳季子廟

讓德光前四大字。蘓軾廟坡仙遺範四大

字。交地方官懸之。

○癸巳

上書周敦頤祠理明太極四大字。陸秀夫祠忠

節不磨四大字。付將軍馬三奇懸之。

○閏四月丙申

御書董子祠正誼明道四大字。胡安定書院經
術造士四大字。平山堂賢守清風四大字。
匾額令地方官懸之。

○十一月庚辰

上允福建學臣沈涵請

賜福建七賢祠

御書匾額各一。楊時祠曰程氏正宗。羅仲彥祠
曰奧學清節。李侗祠曰靜中氣象。胡安國

祠曰霜松雪栢。蔡元定祠曰紫陽羽翼。蔡
沈祠曰學闡圖疇。真德秀祠曰力明正學。
遣內閣中書明德賫付沈涵懸之。

○康熙四十五年十二月庚寅

上諭大學士等曰。宋衡請封孔子四代。自古以
來未嘗有封孔子四代者。前代封孔子為文
宣王。俱未允當。惟明季封為至聖先師。乃永
為不易之號。既不可減。亦不可增。此稱惟孔

子足以當之。

